

Aalajangiiffigisassatut siunnersuummut uunga ilanngussaq 1 naapertorlugu piaarnerpaamik, kingusinnerpaamillu ulloq 1. oktobari 2019-imi atuutilersussamik, Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaannut nr. 1, 25. januaari 2019-imeersuut allannguinnissamik Naalakkersuisut peqquneqarnissaat pillugu Inatsisartunut aalajangiiffigisassatut siunnersuut.

(Inatsisartunut ilaasortaq Aqqaluaq B Egede, Inuit Ataqatigiit)

Akissuteqaat

(Isumaginninnermut, Peqqissutsimut Inatsisinillu Atuutsitsinnermut Naalakkersuisoq)

Siullermeerneqarnera

Inatsisartunut ilaasortap, Aqqaluaq B. Egedep, Inuit Ataqatigiit, aalajangiiffigisassatut siunnersuutaanut Naalakkersuisut qujapput.

Aallaqqaasiutigalugu meeqqat ulloq unnuarlu paaqqinniffinnut inissinneqarsimasut sapinngisaq tamaat pitsaanerpaamik atugassaqartitaallutillu illersugaanissaat Naalakkersuisunut pingaaruteqarmat erseqqissarneqassaaq, tamannalu Meeqqanut ulloq unnuarlu paaqqinniffinnik pilersitsineq ingerlatsinerlu pillugit nalunaarummi nr. 1 25. januaari 2019-imeersukkut ilaatigut qulakkearniarneqarpoq.

Ulloq unnuarlu paaqqinniffiit suliarisartagaannut Naalakkersuisut qujarusupput. Meeqqanut angerlarsimaffiup avataanut sungiusimanngisanut inissinneqartariaqartunut avatangiisissat toqqissisimanartuunissaat pingaaruteqarpoq, tamatumanilu ulloq unnuarlu paaqqinniffiit annertuumik suliaqarput.

Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarunaanni nr. 1 25. januaari 2019-imeersumi aalajangiiffigisassatut siunnersuut malillugu allannguutissanik arlalinnik Naalakkersuisut suliaqaquneqarput.

Nalunaarut allanngorteqquneqartoq nutaajuvoq 1. februaarimilu 2019-imi atuutilerluni, taannalu nalunaarummik novembari 2017-imi atuutilersinneqartumik naleqqussaaneruvoq, taannami arlalinnit naleqqutinngitsortaqartutut uparuarneqarmat, ingammik paaqqinniffiit pioreersut eqqarsaatigalugit. 2018-ip aasaanerani atorfilittat politikerillu ulloq unnuarlu paaqqinniffiit imminut pigisut unammilligassai pillugit ataatsimeeqatigineqartarput, isummersuutigineqartullu tamarmik suliami ilanngunneqarput. Nalunaarut aammattaaq tamanut ammasumik 2018-imi sapaatit akunneri 5-it tusarniutigineqarpoq piffissami 3. oktobarimiit 7. novembarimut, soorluttaaq tamanna toqqaannartumik attuumassuteqartunut naleqquttunut nassiunneqarsimasoq.

Nalunaarut atuuttoq taamaalilluni peqqissaartumik suliarineqarpoq, soorlu tusarniutigineqarnermigut attuumassuteqartunillu peqataatitsinikkut taamaaliortoqartoq.

Nalunaarummi § 36 akuerineqarsinnaanngitsoq allanngortinneqartariaqartorlu siunnersuuteqartup aalajangersimasumik taavaa. Aalajangersagaq taanna naapertorlugu, meeqqanut ulloq unnuarlu paaqqinniffik imminut pigisoq akuerineqassappat, aqutsisunut sulisunullu akissarsiat atorfinitsitaanernilu atugassarititaasut pisortani atorfiit tamakkununga assingusut qaffasissusaat

assigissagaat piumasagaataavoq. Tamanna pingaaruteqartorujussuuvoq, tassami kommunalbestyrelsit tassaammata meeqqanik inissiinerminnut ullormut unnuamullu akigititamik akiliisarnermikkut paaqqinniffinnut imminut pigisunut aningaasalersuisut, taamaammallu akissarsiat qaffasissusaat kommunit ulloq unnuarlu paaqqinniffiutaanni akissarsiaritinneqartut assigissappatigit akuerineqarsinnaasariaqartoq. . Tunngaviusumik atuarfiit namminersortitat angerlarsimaffimmilu atuartitaaneq il.il. pillugit Inatsisartut inatsisaanni kiisalu efterskolit pillugit Inatsisartut inatsisaanni aalajangersakkat taakkununga assingusut takuneqarsinnaapput. Aammattaaq nalunaarummi massakkut atuuttumi § 36-ip nalunaarutaasimasumi § 31 assigaa, taamaattumillu taanna nutaajunngilaq.

Aalajangiiffigisassatut siunnersuutip ilanngussartaani takuneqarsinnaavortaaq aalajangersaakkat tulliuuttuni taaneqartut peerneqassasut allanngortinneqassasulluunniit.

§ 39, imm. 2-5 peerneqarnissaa siunnersuutigineqarpoq, matumani illuutiniq attartornernut aningaasartuutit aamma siulersuisut akissarsiaasa aalajangersimasumik amerlassusiisa sipporneqannginnissaannut tunngasut ilanngullugit. Tassunga atatillugu oqaatigineqassaaq aalajangersakkanut taakkununga ulloq unnuarlu paaqqinniffinnit imminut pigisunit naleqqutinngitsumik aningaasanik peersisoqartannginnissaata qulakkeerneqarnissaa siunertarineqarmat.

§ 40 aamma § 41, imm. 2 allanngortinneqassasut siunnersuutigineqarpoq, taamaalilluni naatsorsuuserineq ingerlatsinerlu pillugit nalinginnaasumik suleriaaseq malinneqassammat. Tassunga atatillugu oqaatigineqassaaq meeqqanut paaqqinniffik imminut pigisoq inuussutissarsiorluni suliaqarnertut nalinginnaasutut isigineqarsinnaanngimmat, aamma ulloq unnuarlu paaqqinniffiit imminut pigisut aningaasaqarnerannut tunngatillugu isertuaatsuunissap qulakkeernissaanut aalajangersakkat taakku pisariaqartut nalilerneqartoq.

§ 45 allanngortinneqassasoq aamma siunnersuutigineqarpoq. Tassunga atatillugu oqaatigineqassaaq aalajangersagaq massakkut atuuttoq naammaginartutut tulluartutullu isigineqarmat, tassami Isumaginninnermut Aqutsisoqarfiup ulloq unnuarlu paaqqinniffimmik matoqqajaasumik oqaloqateqarnissaa, tamannalu naalakkersuisoqarfiup isumaginninnermut akisussaasuusup paaqqinniffiup akuersissutaanik utertitsinnginnerani pinissaa, tassuuna aalajangersarneqarmat.

Tamanna tunngavigalugu siunnersuut itigartinneqassasoq Naalakkersuisunit inassutigineqarpoq.